

Ny Valosoa sy hadihady

Zava-bitan'ny fitondrana Rajoelina

Sady tsy misy fiantraikany amin'ny fiainam-bahoaka no tsy mitondra fampandrosoana azo tsapain-tànana

Mihevitra ny Malagasy ho tsy mahafantatra izay tena mahaso azy mihitsy izao fitondrana tarihan-dRajoelina Andry izao. Ireo miezaka manohana sy manindrahindra izay zava-bitan'ny fitondrana dia mody tsy mahita na jamba mihitsy, satria izay vita rehetra dia lazaina fa goavana sy mendrika ny vahoaka manerana an'i Madagasikara. Niarahana-nahita ny fandaharana tao amin'ny fahitalavitra iray, ka niarovany ireo tetikasan'ny filohan'ny Repoblika. Tsy misy afaka mandà fa tsy ho vita indray andro na iray volana na herintaona ny fampandrosoana, fa rehefa jerena ny zava-bitan'izao fitondrana izao tao anatin'ny telo taona dia sady tsy misy fiantraikany eo amin'ny fiainam-bahoaka no tsy mitondra fampandrosoana azo tsapain-tànana ho an'ny Firenena kanefa dia nihazakazahana, fa hoe hitondra fivoarana ny faritra hanaovana izany. Hanaporofoina izany ny Làlampirenena faha-5 A izay efa nametrahan'ny filohan'ny Repoblika « vato fototra » fanindroany, satria efa nametraha « vato fehizoro » tany ny filohan-pirenena teo aloha, Rajaonarimampianina Hery. Mbola mampikaikaika ireo mpitatitra mpampiasa izany làlana izany ny haratsiany, satria mitarazoka tsy mety vita na dia efa roa taona mahery aza no name-traka izany « vato fototra » izany ny filohan'ny Repoblika. Torak'izany koa ny Làlam-pirenena faha-13 sy faha-10. Rehefa dinihana dia nitondra fampandrosoana sy fampivoarana ny fiainan'ny mponina rehetra eto, tsy mianona ato amin'ny Faritra Analamanga, ve ny nahavitan'ny « colisée » sy ny « kianjan'ny Barea » tao anaty fotoana fohy sady nandaniana vola be ? Etsy ankilany koa dia nirehareha ity tomponandraikitra ao amin'ny minisiteran'ny mponina ity, fa nahavita làlana « pavé » tany amin'ny kaominina na distrika vitsivitsy tany amin'ny Faritra. Nasongadiny

manokana ny zava-bita any Sambava any, izay distrika iray ao anatin'ny sivy ambinifolo ambizato manerana ny Nosy. Niaro ny tetikasan'ny filohan'ny Repoblika momba ilay "télépherique" hapetraka eto an-drenivohitra koa ity mpanohana ny fitondrana ity, satria hono, mba ho afaka mitazana ny tanànan'Antananarivo avy eny ambony eny ny olom-pirenena. Ny mahavariana dia fahafinaretan'ny maso ao anatin'ny minitra vitsivitsy izany no hibabena trosa mandritra ny taona maro. Raha resaka fifamoivoizana indray no dinihana dia tsy hampihena ny isan'ny fiarakodia eto an-drenivohitra velively ny fisian'ny teleferika. Tsy hahafahana manamboatra ny làlana efa tena mampikaikaika ny mpitatitra sy ny mpampiasa azy ny fitaterana hisidisidina eny an'habakabaka eny. Nanamafy ity tomponandraikitra ity fa efa an-dàlana ny fanampiana ny any amin'ny distrikan'lkongo, ka matoa nisy izany fizarana vary amin'ny kapoakana "madco" sy menaka amin'ny kapsily izany dia satria tsy misy ny làlana, ka tsikelikely ny nahatogavan'ny fanampiana, kanefa hono, tsy mampino izany vaovao miparitaka izany. Efa vary enimpolo taonina, hono, no tonga any Nosy Varika kanefa nisy ny rotaka sy fandrohana ny toerana nitobian'izany noho ny fizarana mitanila nataon'ny manampahefana any. Rehefa nantantiana ity tomponandraikitra ity momba ny ady anatin'ny mpanohana ny fitondrana dia namaly izy, fa ny eo anivon'ny mpanohitra no hiparitaka ato anatin'ny fotoana fohy. Araka izany dia mbola miaina sy mijery "video" foana ireo mpanohana ny fitondrana amin'izao fotoana izao, ka asa izay hanjo azy ireo rehefa hitany fa mifanohitra amin'ireny no iainana eto amin'ny Firenena.

Andry Tsiavalona

LISI-PIFIDIANANA

Tsy tokony hatao « documents confidentiels » intsony

Amin'ny volana Janoary 2024 dia izay Filohampirenena voafidy manaraka eo no hitondra antsika, raha ny voalaza ao amin'ny lalampanorenana dia tsy maintsy mametrapialana mialoha ny filoha amperinasa raha mbola sahy hirotsaka, izany hoe azo antoka izany,fa manomboka ny volana Septambra 2023 dia efa tsy filoha intsony Ingahy Rajoelina raha mbola hifaninana.

Tsy ela dia ho tonga io fotoana io, satria isika izao efa hamarana ny volana faharoa amin'ny taona 2022 sahadry. Mila miomana amin'ny fiatrehana izany fotoandehibe izany avokoa ny olompirenena rehetra.

Mikasika ny "Ceni" na ny Vaomieram-pirenena "Mahaleotena" mikarakara ny fifidianana dia io efa iaraha-mahita io ny firafiny, fa dia maro an'isa ny olon'ny fitondrana amin'izao fotoana izao, ka asa raha mbola mety hisy ny mpikambana tsy manaiky lembehana toa an'Andriamatoa Rakotonarivo Thierry ao.

Marihina fa ny lalampanorenana amin'izao fotoana izao dia mampiseho mazava fa tsy ma-

haleo tena ny "Ceni", satria na ny mikasika ny tetiandrom-pifidianana aza dia tsy manantsafidy ny "Ceni", fa tsy maintsy ny fitondrana mpanatantetraka ihany no tompon'ny teny farany. Ny fanazavana nentin'Ingahy Filoha lefitra Andriamalazaray dia mampiomemy araka ny fitenin-jatovo, izay nambara fa tsy ho vita hono ny fanavaozana tanteraka ny lisi-pifidianana, satria tsy misy ny vola hanaovana azy, ka miandry ny fanapahankevitra avy amin'ny fitondrana hono, mikasika izay vola izay. Ny làlana dia mazava fa isaky ny 10 taona no atao ny fanavaozana tanteraka ny lisi-pifidianana na "re-fonte", ny taona 2012 no nisy farany noho izany dia tokony ho amin'ity taona 2022 ity izany ny fanavaozana tanteraka. Nambaran'ny "Ceni" fa ny fanitsiana isantaona ihany no atao aloha izao.

Tsy mitombina ny fialana bala izay manilika ny tsy fanaovana ny fanavaozana tanteraka amin'ny resaka tsy fananambola, satria rehefa làlana io dia tsy maintsy atao, ary tokony hitady izay fomba rehetra ahavitana izany fanavaozana tanteraka

izany ny fitondrana, raha ny mety dia tokony heverina ho toy ny tsy misy intsony ny lisi-pifidianana amin'izao fotoana izao, izay efa fantatra fa feno "doublon" sy nahafahan'ny matoatoa nifidy ihany koa. Noho izany dia tsy tokony hatao intsony ny fanitsiana isan-taona na "Ral" fa mandany vola fotsiny. Hanomboka ny Talata voalohany amin'ny volana Mey ny fivoriana ara-potoana voalohany ho an'ireo fahefana mpanao làlana dia ny Antenimera natao hanitsiana ny làlana mifehy ny teti-bola 2022 izay efa noliana tamin'ny fivoriana ara-potoana faharoa nifarana ny volana Desambra 2021, tokony hatao laharampanahamehana ny fampidirana ao anatin'ny teti-bola hanaovam-panitsiana ny mikasika ny fanoloana tanteraka ny lisi-pifidianana, satria efa voafaritry ny làlana ny tsy maintsy hanaovana tanteraka ny lisi-pifidianana isaky ny 10 taona, ka izay manao fihetsika mifanohitra amin'izany dia mpanitsakitsaka ny làlana velona mendrika ny ho saizana henjana. Kanefa na hisy aza izay

fanovana tanteraka izay dia tokony ho mailo hatrany ny olompirenena rehetra, satria ho azo antoka ve raha fanovana tanteraka no atao, fa tsy fanitsiana toy ny isantaona, dia ho foana ny hosoka ao amin'ny lisi-pifidianana. Sarotra ny mahatoky ny saka satria trondro ny laoka, ny Ceni sy ny Hcc ary ny Minisiteran'ny Atitany dia ampelatanan'ny mpitondra ankehitriny avokoa, ary azo inoana fa tsy maintsy hanao banga mihomehy alina izy rehetra ireo, hanao mihoatra noho ny nataon'ny teo alohany. Nahaolana tokana ihany no azo antoka fa hampadio ny lisi-pifidianana dia ny fanovana ny làlana, izay manasokajy ny lisi-pifidianana ho "documents confidentiels", tokony hova inoana ny làlana ho lasa "documents" misokatra ho an'ny rehetra ny lisi-pifidianana, azo hatao petadrintina any amin'ny biraom-pokontany ho hitan'ny rehetra, amin'izay dia ho raisim-potsiny ireo mpifidy tsy ao anatin'ny fokontany misoratra ao amin'ny trano tsy itoerany akory.

Ny Valosoa



Tsy misy antenaina amin'ny fivahinanan-dRajoelina tany Eorôpa farany teo

Batoto Mpikotrana: niresaka tamin'ny vazaha maro be hono prezda tany. Fa angaha moa vao androany io no niresaka tamin'ny vazaha sy niara-naka sary tamin'ny vazaha fa nitondra nakaiza? Fa tsy vazaha ve moa ilay nidedadedahana tamin'ny fampisehoana ilay IEM tany ivelany ireny, fa nampiova ny firenena ho lasa maninona izany rehefa azo ilay fitondrana? Ary aiza ho aiza ilay Vava be hoe EFA VONONA NY VOLA, VONONA NY TEKNISIANA? Telo taona aty aoriana mbola mikiladilady mangata-bola, mitalaho mi-soleladelaka amin'ireto vazaha satria te hahazo vola. Liana ny vazaha, liana amin'ilay hoe: mba iza loatra no filohan'izany firenena mahantra indrindra izany, liana amin'ny hoe mba iza loatra ilay nampitongana ny harin-karena ho -7,13% izany? Ao ireo te hanontany angamba hoe: ahoana ny teknika fandoaram-bary ho an'olona maromaro nefa tsy misy milatsaka? Mety ao koa no liana amin'ny resaka voly vary hoe ahoana no mahatonga ny varinareo ho 2 taona vao miakatra? Ao ireo liana amin'ny resaka fiompiana, omby vositra mbola vitantsika ny mampiteraka azy. Betsaka ny mahaliana ny olona e! Ny sasany te hahafantatra ilay teknika fizarana menaka amin'ny kapsily, ny sasany variana amin'ilay fizarana vary amin'ny Madco, hafa kely sy mahaliana. Ny sasany angamba liana amin'ny hoe amin'ny fomba ahoana ny fakana sary manoloana ny vatofototra iray nefa tsy atsangana akory ilay orin'asa? Ny tena mety nahaliana ny sasany tao aza angamba dia ny hoe: amin'ny fomba ahoana no hamokarana moto, fiara nefa ny orin'asa mbola tsy mitsangana? Raha ny firesahan'ingahy io amin'ny vazaha no nampandroso efa tanteraka ilay faminiana novohizinareo iny e! Sangany aty Afrika moa sa ahoana? Na hiara-haka sary amin'ny vazaha mandra-pahatapitry ny mandat aza tsy mitondra ny firenena mankaiza izany e! Andramo! Efa manao moa ianareo io ko. Ary mba nankaiza daholo ilay vazaha naderadera tamin'ilay IEM marina aloha e?

Solo Namana: ILAY IEM AZA TENA VAZAH MAROBE NO TEO. NAMPANANTENA, KAY RESA-DRIVOTRA FOTSINY.

Justin Maho: tsy misy raha antenaina tamin-dRajoelina tany Eorope takeo iny.

Soloniriana Ramananjato: Solo Namana: LE VAZAH KOA ZANY MORA MANADINO NY RESAKA NATAO TAMINY KOSA E.

Zaan Paul Tim Randrianary: mba sary nandray vola t@ comorien fanampiana tokony haseho, hihihiiiiii!

Rainy Bary: resy lava Ravalo 4 L, sioka tokana lelikee, loozaa!

Sambilo Sambilo: Rainy Bary: ny azy aza 4L, fa an'i 13 vary madco sy menaka kapisily ! loza ! kkkkk!

TONONKALO

Notra roa ny vokatra

Fa lany "atidoha" ve ny fitondrana Sa inona marina no mitranga, No ela dia ela ny fanovana Sy ny fanentsenana iretsy banga ?

Moa ingahy filoha tsy matoky ny olony Sa be ny safidy ka mahavaka, No toa iretsy lasa, tsy misy solony, Fa ny eo ihany no misabaka ?

Ry veta sy ny patsa fotsiny aza Dia mbola mitoetra eo avara-patana, Kanefa dia tena efa ratsy laza Sy mpamboly ady efa hita vatana !

Be no efa tena leo azy ireo, Ireo mba mpiara-mikatroka tany aloha, Ka dia efa mivory, mampiaka-peo Mba ho tonga any an-tsofin'ingahy filoha !

...Ary moa tsy efa tapitra raha isaina Ireo volana enina nitsapana? Ny vokatra anefa raha toa tsaraina Dia tena "aotra roa" ary igagana !

Ka na mbola ho avy ny fanovana Sy ny fikasana ny hanavao, Dia ambara fa lo ito fitondrana Ary "tsy tafa" intsony raha mbola izao !

TSIMIMALO (21-02-22)